

di Maria Sale

In su giannile meu,

sas istigas

mi so proende

oe a las medire,

e a nd'iscoberrer

s'isterrida 'e su passu.

E sò inoghe,

torra a l'agattare,

pro ponner sas peittas a costazu,

pro nd'ispijar'aerada a car'a pare.

Hap'agattadu cabale sa cabida:

sa mustra de s'andare

est oe che tando,

che cando in palas suas brincaia

e attesu fit de curren su pedinu.

S'ispiju m'est mustrende iscradia-iscradia

su brincu 'e s'istrejida time-time,

su fundu, cunsumidu, 'e sa torrada,

sa tratta ch'impessada,

in sa partida, no haia calculadu fue-fue,

né sinnos haia lassadu 'e dispedida.

Hap'agattadu a tie a m'imbarare:

giannile cunsumidu 'e tantu andare,

cun pesos e cun mattulos de suore

ch'in palas t'han bestidu sas anderas,

mudende poi passazos e caminos.

E so inoghe, oe a t'aporrire

sa giunta de peraulas arribadas

chi tantas boltas hapo carignadu,

pedende a tie su briu pro avanzare.

Cfr. MARIA SALE, *Carignos de 'entu*, Edes, Sassari 2015, pagg. 36-39.